


REPUBLIKA Y'UBURUNDI



IIBIRO VY'UMUKURU W'IGIHUGU

IJAMBO RYA NYENICUBAHIRO

UMUKURU W'IGIHUGU KU MUSI TURAMUTSE

DUHIMBAZA IMYAKA 48 IRANGIYE TURONSE

INTAHE Y'UKWIKUKIRA.

Bujumbura, igenekerezero rya 01 Mwakararo 2010.

**Barundi, Barundikazi,
Ncuti z'Uburundi,**

1. Tubanje gushimira Imana. Mushoboravyose ku migisha yama iduhunda, kandi ikama iturongora mu nzira nziza yo guteza imbere igihugu cacu. Nihabwe icubahiro na bose.
2. Kuri iri genekerezo rya mbere Mukakaro, turamutse duhimbaza mu kanyamuneza ntangere imyaka 48 Uburundi bwikukiye, turonse intahe n'ijambo mu makungu, twitunganiriza ivyerekeye igihugu cacu kandi ari twebwe nyene tukiramutswa.. Kukaba nkako, hari ku wambere Mukakaro umwaka w'1962, aho ibendera ry'Uburundi ryaduzwa, iry'abakavamahanga rikamanutswa, ururirimbo ruhayagiza uburundi bwacu rugasamirana mu gihugu cose.
3. Turipfuriye abarundi n'ababa mu Burundi bose umusi mukuru mwiza, muwuhimbaze mwibuka iragi twasigaranywe n'umuganwa Ludoviko Rwagasore, incungu y'ukwikukira.
4. Ihimbazwa ry'uyu musi mukuru ryoduha akaryo ko kwisuzuma, tukaraba iyo tuvuye, aho dushitse n'ijo turiko turaja ; tukaraba ingene intahe y'ukwikukira twayibungabunze ingene turiko turayikomeza n'ingene twokwama tuyishigikira, turi mu bumwe no mu mahoro.
5. Icivugo c'uno musi ni : **Dufatane mu nda dutsimbataze ubumwe n'amahoro, ni vyo mushinge w'intahe y'ukwikukira nyakuri.**

**Barundi, Barundikazi,
Ncuti z'Uburundi,**

6. Ukwikukira Rwagasore yaharaniye ntikwari gushingiye ku kwirukana ba kavamahangaha ahubwo kwari gushingiye ku gusubiza abarundi iteka n'ijambo bari baranyazwe, baheze bitunganirize ivy'igihugu cabo bongere bakiramutswe, na cane cane biciye mu kwitorera indongozi, tukubahiriza imigenzo n'akaranga vyiza vyacu.

7. Ico twomenya ni uko ukwikukira atari kuba nyamwigendako. Ni co gituma mu kubungabunga intahe y'ukwikukira tudasiga inyuma kubungabunga imigenderanire dufitaniye n'ibindibihugu n'amashirahamwe mpuzamakungu.
8. Ntibisigura kandi ko ataco tuba tugikeneye ku banyamahanga, turabasaba ngo baduterere agacumu k'ubumwe mu vyo tutishoboreye, ariko tukareka kuzera inze. Vyongeye, natwe ukwikukira kudusaba kwitera iteka, tugatera imbere, mbere tugafasha ibindi bihugu, ni ryo ragi dusanga mu ruririmbo ruhayagiza igihugu cacu ; gurtyo tugakomerwa amashi n'amakungu.

**Barundi, Barundikazi,
Ncuti z'Uburundi,**

9. Muti none hakozwe iki mu ntnumbero yo gushigikira iyo ntahe y'ukwikukira ? Uturorero ni twinshi.
10. Abarundi twaravavanuye na ya ngeso mbi yari iharawe yo kuvuguruza abanyagihugu mu kudasonera iryo baba bapfunditse, iyo ngeso ikaba yagiye irasiga amaganya n'amarira mu miryango.
11. Ubu iyo ngendo iriko irahinduka kuko tumaze imyaka itanu mu ntwaro yitorewe n'abarundi, bikaba bitari bwigere biba kuko hari hamenyerewe intwaro z'agasumiranyo n'agahotoro, aho umunyagihugu ata jambo yagira canke ngo yitwararikwe.
12. Ubu twaravavanuye kandi na ya ngeso mbi yo gufatira ingingo mu kirere, abenegihugu barahabwa ijambo mu biraba igihugu cabo, ubu iterambere rikaba riva ku banyagihugu rikongera rikabagarukako. Ni murabe inyungu yavyo mu bijanye n'amashure, amavuriro, ibidukikije n'ibindi biyemeje, bakabikora ata mfashanyo turinze gusaba canke ngo bive muri Leta.
13. Twaragwije ibikorwa haba mu kwubaka amashure, amavuriro, amabarabara, mu kurwanya inzara n'ibindi, kuko ubunebwe n'ubukene bishobora kutuzingamika.

14. Igihambaye rero ni uko twokwamiza ku muzirikanyi ko iyo ntahe y'ukwikukira twayironse itugoye, kandi ko umurundi wese yokwitwararika kuyishigikiza ubumwe, amahoro n'urukundo rw'igihugu ciwe, ruzira kuvuguruza abanyagihugu. **Dufatanye mu nda rero tugatsimbataza ubumwe n'amahoro**, tuba **dutanze umushinge nyawo w'intahe y'ukwikukira nyakuri**, kuko ivyo ni vyo vyari vyarabuze kuva twikukiye, maze bitubera akaga n'ubuyobe bw'amacakubiri, ikumirana, urwanko n'ingendo mbi y'ikinyoma n'uruyeri muri politike y'ubutegetsi bwagiye burakurikirana.
15. Duhiriwe duhishije uyu musi turamutse duhimbaza imyaka 48 tumaze turonse intahe y'ukwikukira, uhuriranye n'imisi mikuru ibiri ihambaye mu buzima bw'igihugu cacu:
Ubwa mbere : Duhimbaza imyaka itatu Uburundi bumaze bwinjiye mw'Ishirahamwe ry'ibihugu via Afrika y'ubuseruko.
Ubwa kabiri : Duhimbaza umusi uhambaye aho ibihugu bigize iryo Shirahamwe biramutse vyinjira icese mw'isoko rusangi ryavyo.
16. Ibi navyo bituma tugiriranira imigenderanire myiza n'ibihugu bibanyi, Uburundi bukabaho mu mahoro, bugatera imbere, gurtyo tukaba dutsimbataje kandi dukingiye intahe y'ukwikukira kw'igihugu cacu, bisigura gushinga icumu mu mashinga, tugaheza natwe tugahagarara neza, tugashikama.

**Barundi, Barundikazi,
Ncuti z'Uburundi,**

17. Turi mu kiringo ciza c'amatora. Amatora abiri aramaze kurangira, kandi yagenze neza. N'ayandi ari mu myuma, nayo nyene nta nkeka azogenda neza cane kurusha ayo twabonye mu 2005, mu 1993 n'ayandi yo kuva twikukiye.
18. Turahamagariye abarundi bose bakwije ibitegekanijwe n'amategeko ngo babandanye kwitaba amatora yimirije, baze bayitabe ari benshi, kuko ari uburenganzira bwabo bwo kwitorera indongozi, kandi ko ata n'umwe arekuriwe kububaka naburya twaburonse bigoranye.

19. Turakengurukiye bimwe bivuye ku mutima abo bose bafashize kugira ngo amatora ategurwe neza kandi agende neza nk' ibihugu n'amashirahamwe mpuzamakungu vyaduterereye agacumu k'ubumwe mu kuturonsa uburyo no mu kurungika abarorerezi babo, kandi tukabasaba kubandanya gushika amatora yose arangire.
20. Turakengurukiye abamenyeshamana n'abakozi b'imana, amashirahamwe, abamenyeshamakuru, eka abo bose bitanze bagakwirikirana amatora tumaze kurangiza, bagatako bagashikiriza abarundi n'amakungu inkuru y'imvaho, tukabasaba ko bobandanya bafasha mu matora asigaye twimirije.
21. Turakengurukiye abanyamigambwe bitavye aya matora, twibutsa kandi abayaciriye hagati ko hitoza uwushaka abona ko akwije vya ngombwa, nta gahato karimwo rero, ariko vyari kuba vyiza umwe wese yipimye akabaza abenegihugu uko bakira imigambi n'ingendo vyiwe.
22. Iyo hari uwushimye kwidohora mw'ihiganwa rero, ni asokore atarinze kwitwaza imvo kumbure zidafashe mbere abarundi benshi banegura. Ni bikebuke, bemere aho intahe ishize, kuko kudasonera ingingo abenegihugu baba bafashe, ni vyo vyagiye birashira Uburundi mu kaga, ariko aho hari kera kuko amase ya kera ntahoma urutaro.
 Bumve rero ko demokarasi atari ugutsinda amatora igihe cose kandi ntabatsindira rimwe. Vyongeye amatora ni kimwe, ukubaho ni ikindi. Ni ivyumvikana, kandi tubitegere neza, ivyo bifise izindi nzira vyocamwo atari iy'ikinyoma, irementanya no kwidohora.
23. Turakengurukiye abajejwe intwaro n'umutekano ku ruhara bagize kugira ngo amatora tumaze kurangiza agende neza. Ni babandanye uko no mu matora asigaye, nakare si ivyo bacigishwa.

24. Turakeje abanyagihugu n'abajejwe umutekano ingene bamaze imisi basenyera ku mugizi umwe, bagatesha mbere bagafata inkozi z'ibibi zimaze imisi zitoba canke zitera ubwoba abanyagihugu. Mukomere, mutuze izo nkorabara. Abajejwe ubutungane babacire imanza ata kinya kandi mu bubangutsi.
25. Ntitwokwibagira gushimira abanyagihugu batahuye ko gutora indongozi zabo ari agateka kabu, bakitaba amatora naho imirimo bafise ari myinshi. Ni bagume bima amatwi abo bose boshaka kubacisha mu nzira itari yo, kanatsinda ntibakibeshwa babona, basigaye bazi gutandukanya icatsi n'ururo, nakare igiti ntikigukora mu jisho kabiri kandi ngo inda woyibaza uwayirayeko.
- Turagabisha intumva zitobera abarundi tuzihanura ngo zirekere aho, nayo abafashwe bahanwe hisunzwe amategeko kandi ku gatwe kabu. Uwohirahira nawe ngo arekure bene izo nkozi z'ikibi canke ngo azitorokeshe, ahanwe bikomeye.
26. Imbere y'ugusozenza rino jambo, Twashaka dusubire tubipfurize mwese umusi mukuru mwiza, muwuhimbaze muzirikana ico usigura, ico Umuganwa Ludoviko Rwagasore n'abo basangije urugamba baronderera abarundi n'Uburundi.
27. Mwame mumenza ko Uburundi ari nk'umuryango aho abawugize bose bafise ico baterera mw'itunganya no mw'iterambere ryawo. Ntihagire rero uwikumira mu kwubaka Uburundi, ahubwo **Dufatane mu nda, dukore, dutsimbataze ubumwe n'amahoro, kuko ni vyo mushinge w'intahe y'ukwikukira nyakuri.** Turongeye gusabira Abarundi benewacu ko Uwuhoraho yoduha ubwenge n'ubukerebutsi vyo kubaka no gukomeza igihugu cacu yaduhaye. Dusavye Abarundi bose ko bobandanya basengera igihugu cacu twongere dusengeranira.

Imana ibahezagire,

Murakoze.